

現代生活藝術系列

華嚴經疏論纂要 83

— 如來十身相海品

華藏淨宗學會印贈

大方廣佛華嚴經疏論纂要卷第八十三



五臺山清涼國師澄觀疏鈔

太原方山長者李通玄 論

閩鼓山私淑比丘道霈纂要

如來十身相海品第三十四

○初大意三段

〔疏〕初來意者。前品總明果法。此品別顯相德。近答前品身問。遠答普光眼等六根。非唯眼等徧於法界。而各具多相用。難思議故。

〔疏〕二釋名者。如來十身。標人顯德。言相海者。依人

顯相。如來十身。竝如前釋。福報奇狀。炳著名相。相德深廣。故稱爲海。故文云。有十蓮華。藏微塵數。相相體廣矣。一一用徧。相用廣矣。一一難思。互相融入體用深矣。若此之相。唯屬圓教。標以十身故。觀佛三昧海經。辨相有三類。一畧中畧說。有三十二相。二畧說。八萬四千相。三廣說。有無量相。如雜華經中。爲普賢賢首等說。雜華卽此經異名。三中初通權小。示同於人。端正不亂。故次唯大乘。菩薩修八萬四千波羅密。故後唯一乘。一乘修無盡行。故又初化。次報。後屬十身。十身之相海。依王釋也。又

初凡聖同見。次唯地上。後唯圓機。然通五位。鈔次唯大

乘者。即明果相。如因中斷八萬四千煩惱。成八萬

四千波羅密。獲八萬四千相好。無量壽觀經云。阿

彌陀佛。有八萬四千相。一一相。有八萬四千好。一

佛。好復有八萬四千光明。一一光明。徧照法界。念

即此中等相也。若語其體。初以形色。次即定慧。後以無盡法界。若語其因。後通純雜。如初會說。故

一一相果。皆周法界。前二相因。如瑜伽智度等論。

涅槃大集等經。廣如章說。通純雜者。即是圓融相。因。如前主水神處。已明。

前二相因者。指廣有源。瑜伽四十九云。一切菩薩

資糧。皆感相好。作業者。宣說種種業。各各感等。如

是。三十二相。無有差別。當知皆由淨戒。為因。若犯

戒。尚不得下賤人身。况佛相好。若言各各業感。如

契經說。即是別因。就中有一行感一相。如云。若諸

有情。有所希冀。隨其所樂。正捨珍財。感得頰如師

子是或一行感多相。如能施悅意發喜飲食嚴具等。感身皮金色常光一尋。一毛孔一毛生。身皮細滑等。或多行感一相。如言於其父母種種供養於諸有情諸苦惱事。種種救護。由往來等動轉業故。得足下千輻輪相。又由四種修事業感一切相。謂決定修感足下善安住。由委悉修感千輻輪等。由恒常修感纖長指等。由無罪修感餘相皮金色等。

〔疏〕三宗趣者。顯無盡相海為宗。令修無盡之行。顯

成為趣。趣。今修無盡之行。顯成為趣者。顯約本有成約修生。

〔論〕將釋此品。約分三門。一釋品來意。二釋能說法主。三隨文釋義。一釋品來意者。明前品說自佛三業。二智入不思議際徧周。廣大無限。饒益衆生。此品約三業。二智入不思議智中之報身。故此品來

也。一釋能說法王者。明此相海。由行報成。普賢是行。還令行者自說。自行報德之果。三隨文釋義者。於此一品經。長分九十九段。

○後正釋文。文有三別。第一誠聽許說。二正陳相狀。三結畧顯廣。今初。

爾時普賢菩薩摩訶薩。告諸菩薩言。佛子。今當爲汝演說如來所有相海。

〔疏〕所以普賢說者。相海普周故。令行普行。獲普相。故普賢本是會主。前說已窮。此便說故。或前品未經來未盡。更應別答國土等問故。

○第二正陳相狀。畧舉九十七相。文通有五。一依處。二列名。三體嚴。四業用。五結數。或畧不具。至文當知。或加成益。業用中攝。然名依體用以立。皆以體用釋名。或單從體用。或雙從二。隨文思之。或名與體用義不相似者。則是文畧義含耳。細論一相各依一處。則爲九十七段。經自標次。今以類例相從。依十八處。卽爲十八段。始自於頂。終至於足。斯卽順觀相海。鈔一從頂至足輪。名爲順觀。二從足輪至頂。名逆觀。今初依頂中。有三十二相。故云。今是順觀。

佛子。如來頂上有三十二寶莊嚴大人相。其中有大

人相名光照一切方。普放無量大光明網。一切妙寶以爲莊嚴。寶髮周徧。柔軟密緻。一一咸放。摩尼寶光。充滿一切無邊世界。悉現佛身色相圓滿。是爲一

疏。文三初約處總標。次其中下別列名相。後佛子下。總結爲嚴。今初寶莊嚴者。通顯體嚴事實。則云皆摩尼等爲莊嚴故。亦顯智寶圓淨嚴故。一一相中皆有事理。二嚴隨宜解釋。大人相者。大人之相故。二別列中。三十二相。文各唯四。以依處一種。已總標故。此處獨有三十二者。理實應多。爲顯圓融。一卽一切故。一頂中便具權教三十二數。若爾餘

何不然顯頂尊勝故善生經云一切世間福不及
如來一毛功德一切毛功德不及一好功德一切
好功德不及一相一切相不及白毫白毫復不及
無見頂相故知勝也第一相中四者一列名各從
用立二一切妙寶下體嚴三一一下業用四是爲
一者結數他皆倣此。鈔一列名者謂此各光照一
切方等下辨業用云一一咸
放摩尼寶光等明知從用以立光名下諸文
勢皆悉如是或從用立或從體德可以意求
次有大人相名佛眼光明雲以摩尼王種種莊嚴出
金色光如眉間毫相所放光明其光普照一切世界
是爲二

疏二。中體嚴卽釋光明義。其光下業用。釋佛眼義。佛眼無不照。故餘竝準思。毫相放光。如現相品說。雲義亦如初會。

次有大人相。名充滿法界雲。上妙寶輪以爲莊嚴。放於如來福智燈明。普照十方一切法界諸世界海。於中普現一切諸佛及諸菩薩。是爲三次。次有大人相。名示現普照雲。真金摩尼種種莊嚴。其諸妙寶咸放光明。照不思議諸佛國土。一切諸佛於中出現。是爲四次。次有大人相。名放寶光明雲。摩尼寶王清淨莊嚴。毗瑠璃寶以爲華藻。光照十方一切法界。於中普現種

種神變讚歎如來往昔所行智慧功德。是爲五次有大人相。名示現如來徧法界。大自在雲。菩薩神變寶燄摩尼。以爲其冠。具如來力覺悟一切。寶燄光輪。以爲其鬘。其光普照十方世界。於中示現一切如來坐於道場。一切智雲。充滿虛空。無量法界。是爲六次。有大人相。名如來普燈雲。以能震動法界國土。大自在寶海。而爲莊嚴。放淨光明。充滿法界。於中普現十方諸菩薩功德海。過現未來。佛智慧幢海。是爲七次。有大人相。名普照諸佛廣大雲。因陀羅寶如意王寶摩尼王寶。以爲莊嚴。常放菩薩燄燈光明。普照十方一

切世界。於中顯現一切諸佛衆色相海。大音聲海。清淨力海。是爲八。

〔疏〕八中嚴內。摩尼名意故。不同如意。

次有大人相。名圓滿光明雲。上妙瑠璃摩尼王種種寶華。以爲莊嚴。一切衆寶舒大燄網。充滿十方一切世界。一切衆生悉見如來。現坐其前。讚歎諸佛及諸菩薩法身功德。令人如來清淨境界。是爲九。次有大人相。名普照一切菩薩行藏光明雲。衆寶妙華。以爲莊嚴。寶光普照無量世界。寶燄普覆一切國土。十方法界通達無礙。震動佛音宣暢法海。是爲十。次有大

人相。名普光照耀雲。毗瑠璃因陀羅金剛摩尼寶。以爲莊嚴。瑠璃寶光色相明徹。普照一切諸世界海。出妙音聲。充滿法界。如是皆從諸佛智慧大功德海之所化現。是爲十一。

〔疏〕十一中。如是皆從下。辨業用因。亦業用攝。

次有大人相。名正覺雲。以雜寶華而爲莊嚴。其諸寶華。悉放光明。皆有如來坐於道場。充滿一切無邊世界。令諸世界普得清淨。永斷一切妄想分別。是爲十二。次有大人相。名光明照耀雲。以寶猷藏海心王摩尼而爲莊嚴。放大光明。光中顯現無量菩薩及諸菩

薩所行之行。一切如來智身法身諸色相海。充滿法界。是爲十三。次有大人相。名莊嚴普照雲。以金剛華毗瑠璃寶而爲莊嚴。放大光明。光中有大寶蓮華座。具足莊嚴。彌覆法界。自然演說四菩薩行。其音普徧諸法界海。是爲十四。

〔疏〕十四用中云。四菩薩行者。瑜伽菩薩地云。一切菩薩畧有四行。一。波羅密行。二。菩提分法行。三。神通行。四。成熟有情行。

次有大人相。名現佛三昧海。行雲於一念中示現如來無量莊嚴。普徧莊嚴一切法界。不思議世界海。是

爲十五。次有大人相。名變化海普照雲。妙寶蓮華。如須彌山。以爲莊嚴。衆寶光明。從佛願生。現諸變化。無有窮盡。是爲十六。次有大人相。名一切如來解脫雲。清淨妙寶。以爲莊嚴。放大光明。莊嚴一切佛師子座。示現一切諸佛色像。及無量佛法。諸佛刹海。是爲十七。次有大人相。名自在方便普照雲。毗瑠璃華。真金蓮華。摩尼王燈。妙法燄雲。以爲莊嚴。放一切諸佛寶燄。密雲清淨光明。充滿法界。於中普現一切妙好莊嚴之具。是爲十八。次有大人相。名覺佛種性雲。無量寶光。以爲莊嚴。具足千輪。內外清淨。從於往昔善根。

所生。其光徧照十方世界。發明智日。宣布法海。是爲
十九

疏十九云。具足千輪者。梵本云。具千輻輪也。

次有大人相。名現一切如來相。自在雲。衆寶瓔珞。瑠
璃寶華。以爲莊嚴。舒大寶燄。充滿法界。於中普現等
一切佛刹。微塵數去來。現在無量諸佛。如師子王。勇
猛無畏。色相智慧。皆悉具足。是爲二十。次有大人相
名徧照一切法界雲。如來寶相。清淨莊嚴。放大光明
普照法界。顯現一切無量無邊諸佛菩薩智慧妙藏。
是爲二十一

疏二十一示身智二光俱顯智慧

次有大人相。名毗盧遮那如來相雲。上妙寶華及毗
瑠璃清淨妙月。以爲莊嚴。悉放無量百千萬億摩尼
寶光。充滿一切虛空法界。於中示現無量佛刹。皆有
如來結跏趺坐。是爲二十二。次有大人相。名普照一
切佛光明雲。衆寶妙燈。以爲莊嚴。放淨光明徧照十
方一切世界。悉現諸佛轉於法輪。是爲二十三。次有
大人相。名普現一切莊嚴雲。種種寶燄。以爲莊嚴。放
淨光明。充滿法界。念念常現。不可說不可說一切諸
佛與諸菩薩。坐於道場。是爲二十四。次有大人相。名

出一切法界音聲雲。摩尼寶海上妙栴檀以爲莊嚴。舒大燄網充滿法界。其中普演微妙音聲。示諸衆生一切業海。是爲二十五。次有大人相。名普照。諸佛變化輪雲。如來淨眼以爲莊嚴。光照十方一切世界。於中普現去來今佛所有一切莊嚴之具。復出妙音演不思議廣大法海。是爲二十六。

疏二十六中莊嚴云。如來淨眼爲莊嚴者。此通十眼。光照下顯業用。亦通身智二光。淨眼及光。釋前普照現於嚴具。是上輪義。卽法輪故。

次有大人相。名光照佛海雲。其光普照一切世界。盡

於法界無所障礙。悉有如來結跏趺坐。是爲二十七。
次有大人相。名寶燈雲。放於如來廣大光明。普照十
方一切法界。於中普現一切諸佛及諸菩薩。不可思
議諸衆生海。是爲二十八。次有大人相。名法界無差
別雲。放於如來大智光明。普照十方諸佛國土。一切
菩薩道場衆會無量法海。於中普現種種神通。復出
妙音。隨諸衆生心之所樂。演說普賢菩薩行願。令其
迴向。是爲二十九。次有大人相。名安住一切世界海
普照雲。放寶光明。充滿一切虛空法界。於中普現淨
妙道場。及佛菩薩莊嚴身相。令其見者得無所見。是

爲三十。次有大人相。名一切寶清淨光燄雲。放於無量諸佛菩薩摩尼妙寶清淨光明。普照十方一切法界。於中普現諸菩薩海。莫不具足如來神力。常遊十方盡虛空界。一切剎網。是爲三十一。

疏從二十七至三十一。並畧無莊嚴。亦由名中已含有故。

次有大人相。名普照一切法界莊嚴雲。最處於中。漸次隆起。閻浮檀金因陀羅網。以爲莊嚴。放淨光雲。充滿法界。念念常現一切世界諸佛菩薩道場衆會。是爲三十二。

〔疏〕三十二。先名。次最處下。體嚴。此居頂極。特顯別處。故云處中。則知所餘。皆繞此相。畧不明耳。漸次隆起者。正顯其相。智論第五云。如來頂有骨髻如拳。觀佛三昧經云。如合拳。卽隆起之相也。鈔觀佛卽第四經引此成上如拳。拳言尙隱。合拳。卽覆拳於頂上有隆起之相也。然此相能滅一切罪。長一切福。故佛頂尊勝。止明於此。卽身瑟尼沙。暫念暫觀。延善住之壽。滅地獄之苦。不受七反畜生。永離

人間
殘報

佛子。如來頂上。有如是三十二種大人相。以爲嚴好。

〔疏〕三總結爲嚴

○第二眉間有一相

佛子。如來眉間有大人相。名徧法界。光明雲。摩尼寶華。以爲莊嚴。放大光明。具衆寶色。猶如日月洞徹清淨。其光普照十方國土。於中顯現一切佛身。復出妙音。宣暢法海。是爲三十三。

〔疏〕自下竝有依處。故文皆有五。初依處。二顯名。三摩尼下體嚴。謂此相若收。則右旋如覆瑠璃椀。若展。則具十楞。有大光明。嚴唯一寶。光具多色。中表皆空。卽是洞徹。四其光下業用。復出已下。卽是法光。故此光名。從用而立。五結數。可知。〔鈔〕則具十楞。昧經第二。廣說觀白毫之相。彼經先說白毫之因。云從捨心不慳。不見前相。不憶財物。無所封著。而

行布施。下取意引持戒忍辱。六度十力。四無所畏。諸妙功德。生次云。我滅度後。有諸弟子。晝夜六時。能於一時中。少分少分之中。能須臾間。念佛白毫。令心了了。無謬亂想。分明止住。注意不息。念白毫者。若見相好。若不得見。如是等人。除九十六億那由他。恒河沙微塵數劫。生處之罪。佛告父王。如來有無量相好。一一相中。有八萬四千諸小相好。如是相好。不及白毫少分功德。釋曰。故應觀察。况依此經。如是而觀。

○第三眼。第四鼻。各有一相。

如來眼有大人相。名自在。普見雲。以衆妙寶而爲莊嚴。摩尼寶光清淨。映徹普見。一切皆無障礙。是爲三十四。如來鼻有大人相。名一切神通智慧雲。清淨妙寶。以爲莊嚴。衆寶色光。彌覆其上。於中出現無量化。

佛坐寶蓮華。往諸世界。爲一切菩薩。一切衆生。演不思議諸佛法海。是爲三十五。

○第五舌有四相

如來舌有大人相。名示現音聲影像雲。衆色妙寶。以爲莊嚴。宿世善根之所成就。其舌廣長。徧覆一切諸世界海。如來若或熙怡微笑。必放一切摩尼寶光。其光普照十方世界。能令一切心得清涼。去來現在。所有諸佛。皆於光中炳然顯現。悉演廣大微妙之音。徧一切刹。住無量劫。是爲三十六。如來舌復有大人相。名法界雲。其掌安平。衆寶爲嚴。放妙寶光色。相圓滿。

猶如眉間所放光明。其光普照一切佛刹。唯塵所成。無有自性。光中復現無量諸佛。咸發妙音。說一切法。是爲三十七。

〔疏〕初一卽舌廣長相。於體巖中宿善成者。此舉因嚴。偏此說因者。令讚演一乘故。其舌廣長卽語其體。福德人至鼻。權佛至髮際。餘大乘中明現神足。方至梵世。或覆三千。今直語體。便覆一切。後如來下。辨其業用。演法釋音聲。現佛釋影像。鈔福德人論文。或至梵世。卽法華經如來神力品。爾時如來出廣長舌。上至梵世。或覆三千。卽阿彌陀云。出廣長舌。徧覆三千大千世界。說誠實言。二舌掌之相。掌謂近根。其光下。

顯業用光。照諸刹令應度者。無俟觀破搏聚自曉。

但合塵成何性之有。

無俟觀破者。金剛經云。須菩提。於意云何。三千大千世界。

所有微塵。是為多不。須菩提言。甚多。世尊。須菩提。諸微塵。如來說。非微塵。是名微塵。如來說。世界。非世界。是名世界。釋曰。此段論名第十色及衆生身。搏取中觀破相應行任處大意云。衆生世界。但攪塵成。今從麤至細。乃至極微。皆無實體。故云。世界則非世界。今云。無俟觀破者。觀破但是假想。為未了者。若了法本空。不待觀破。又彼云。搏取。今云。搏聚。是義引耳。什公云。欲破極微。覺賢云。以一故。衆以衆故。一微自無性。則為空矣。餘如前說。

如來舌端有大人相。名照法界光明雲。如意寶王。以為莊嚴。自然恒出金色寶燄。於中影現一切佛海。復震妙音。充滿一切無邊世界。一一音中。具一切音。悉

演妙法聽者心悅。經無量劫玩味不忘。是爲三十八。
如來舌端復有大人相。名照耀法界雲。摩尼寶王以
爲嚴飾。演衆色相微妙光明。充滿十方無量國土。盡
於法界靡不清淨。於中悉有無量諸佛及諸菩薩。各
吐妙音種種開示一切菩薩現前聽受。是爲三十九。
疏後二同在舌端。或居左右。或在上下。觀文業用
但有展卷不同。前則卷佛海於舌端。後則展諸佛
於法界。

○第六上齶一相

如來口上齶有大人相。名示現不思議法界雲。因陀

羅寶毗瑠璃寶以爲莊嚴。放香燈燄清淨光雲。充滿十方一切法界。示現種種神通方便。普於一切諸世界海。開演甚深不思議法。是爲四十

〔疏〕上齧既有。下亦宜然。或是梵本脫漏。

○第七牙有四相

如來口右輔下牙有大人相。名佛牙雲。衆寶摩尼卍字相輪以爲莊嚴。放大光明普照法界。於中普現一切佛身。周流十方開悟羣生。是爲四十一

〔疏〕謂左右上下四大牙故。故佛涅槃。四牙不碎。輔頰也。亦云頰車骨也。

如來口右輔上牙有大人相。名寶燄。彌盧藏雲。摩尼寶藏以爲莊嚴。放金剛香燄。清淨光明。一一光明充滿法界。示現一切諸佛神力。復現一切十方世界淨妙道場。是爲四十二。

疏二右輔上牙名彌盧者。顯妙高故。

如來口左輔下牙有大人相。名寶燈。普照雲。一切妙寶。舒華發香。以爲莊嚴。放燈燄雲。清淨光明。充滿一切諸世界海。於中顯現一切諸佛。坐蓮華藏。師子之座。諸菩薩衆所共圍繞。是爲四十三。如來口左輔上牙有大人相。名照現如來雲。清淨光明。閻浮檀金寶。

網寶華以爲莊嚴。放大燄輪。充滿法界。於中普現一切諸佛。以神通力。於虛空中。流布法乳。法燈。法寶。教化一切諸菩薩衆。是爲四十四。

〔疏〕四中有法乳等三。同一演法。約資法身名乳。照

了萬境稱燈。令其圓淨爲寶。卽演三德涅槃之法。

亦成三德涅槃之益也。〔鈔〕四中有法乳者。論第三

二如眼三如明四大果功德五無罪想今云法燈含明眼二義大果卽資法身無罪總明離過

○第八齒有一相

如來齒有大人相。名普現光明雲。一一齒間相海莊嚴。若微笑時。悉放光明。具衆寶色。摩尼寶燄。右旋宛

轉流布法界靡不充滿。演佛言音說普賢行。是爲四十五。

○第九脣有一相

如來脣有大人相。名影現一切寶光雲。放閻浮檀真金色。蓮華色。一切寶色廣大光明。照於法界。悉令清淨。是爲四十六。

〔疏〕上二各應分出上下。放閻浮下。體嚴以脣色赤好。如日初出紅蓮葉故。後照於下。業用。

○第十頸有一相

如來頸有大人相。名普照一切世界雲。摩尼寶王以

爲莊嚴。紺蒲成就。柔軟細滑。放毗盧遮那清淨光明。
充滿十方一切世界。於中普現一切諸佛。是爲四十
七。

○第十一肩有五相

如來右肩有大人相。名佛廣大一切寶雲。放一切寶
色真金色蓮華色光明。成寶燄網普照法界。於中普
現一切菩薩。是爲四十八。如來右肩復有大人相。名
最勝寶普照雲。其色清淨如閻浮金。放摩尼光充滿
法界。於中普現一切菩薩。是爲四十九。如來左肩有
大人相。名最勝光照法界雲。猶如頂上。及以眉間種

種莊嚴。放閻浮檀金及蓮華色衆寶光明。成大燄網。充滿法界。於中示現一切神力。是爲五十。如來左肩復有大人相。名光明徧照雲。其相右旋。閻浮檀金色。摩尼寶王以爲莊嚴。放衆寶華香燄光明。充滿法界。於中普現一切諸佛。及以一切嚴淨國土。是爲五十一。如來左肩復有大人相。名普照耀雲。其相右旋。微密莊嚴。放佛燈燄雲。清淨光明。充滿法界。於中顯現一切菩薩種種莊嚴。悉皆妙好。是爲五十二。

〔疏〕右二左三或亦脫也

○第十二胸有十一相

如來留臆有大人相。形如卍字。名吉祥海雲。摩尼寶華以爲莊嚴。放一切寶色種種光燄輪。充滿法界。普令清淨。復出妙音宣暢法海。是爲五十三。吉祥相右邊有大人相。名示現光照雲。因陀羅網以爲莊嚴。放大光輪。充滿法界。於中普現無量諸佛。是爲五十四。吉祥相右邊復有大人相。名普現如來雲。以諸菩薩摩尼寶冠而爲莊嚴。放大光明普照十方一切世界。悉令清淨。於中示現去來今佛坐於道場。普現神力。廣宣法海。是爲五十五。吉祥相右邊復有大人相。名開敷華雲。摩尼寶華以爲莊嚴。放寶香燄燈清淨光。

明狀如蓮華充滿世界。是爲五十六。吉祥相右邊復有大人相。名可悅樂。金色雲。以一切寶心王藏摩尼王而爲莊嚴。放淨光明照於法界。於中普現。猶如佛眼廣大光明。摩尼寶藏。是爲五十七。吉祥相右邊復有大人相。名佛海雲。毗瑠璃寶香燈華鬘。以爲莊嚴。放滿虛空。摩尼寶王香燈大燄清淨光明。充徧十方一切國土。於中普現道場衆會。是爲五十八。吉祥相左邊有大人相。名示現光明雲。無數菩薩坐寶蓮華。以爲莊嚴。放摩尼王種種間錯寶燄光明。普淨一切諸法界海。於中示現無量諸佛。及佛妙音演說諸法。

是爲五十九。吉祥相左邊。復有大人相。名示現徧法界。光明雲。摩尼寶海。以爲莊嚴。放大光明徧一切刹。於中普現諸菩薩衆。是爲六十。吉祥相左邊。復有大人相。名普勝雲。日光明。摩尼王寶輪鬘。而爲莊嚴。放大光燄。充滿法界。諸世界海。於中示現一切世界一切如來。一切衆生。是爲六十一。吉祥相左邊。復有大人相。名轉法輪妙音雲。一切法燈。清淨香藥。以爲莊嚴。放大光明。充滿法界。於中普現一切諸佛所有相。海及以心海。是爲六十二。吉祥相左邊。復有大人相。名莊嚴雲。以去來今一切佛海。而爲莊嚴。放淨光明。

嚴淨一切諸佛國土。於中普現十方一切諸佛菩薩
及佛菩薩所行之行。是爲六十三

〔疏〕初一當中。左右各五。今初二字。正翻爲吉祥海
雲。以依形立名。故先標形相應。廻安名下。以屬體
攝。無違前後。左右可知

○第十三手有十三相

如來右手有大人相。名海照雲。衆寶莊嚴。恒放月燄
清淨光明。充滿虛空。一切世界。發大音聲。歎美一切
諸菩薩。行是爲六十四。如來右手復有大人相。名影
現照耀雲。以毗瑠璃帝青摩尼寶華而爲莊嚴。放大

光明普照十方菩薩所住蓮華藏摩尼藏等一切世界。於中悉現無量諸佛。以淨法身坐菩提樹。震動一切十方國土。是爲六十五。如來右手復有大人相。名燈燄鬘普嚴淨雲。毗盧遮那寶以爲莊嚴。放大光明。成變化網。於中普現諸菩薩衆。咸戴寶冠。演諸行海。是爲六十六。如來右手復有大人相。名普現一切摩尼雲。蓮華燄燈而爲莊嚴。放海藏光。充徧法界。於中普現無量諸佛。坐蓮華座。是爲六十七。如來右手復有大人相。名光明雲。摩尼燄海以爲莊嚴。放衆寶燄香燄華燄清淨光明。充滿一切諸世界。網於中普現

諸佛道場。是爲六十八

〔疏〕分三。初九直語手相。右五左四者。或左腕一。或表右常用故。而前肩。則右二左三。相通正等。右中六十六云。成變化網者。光化爲網也。

如來左手有大人相。名毗瑠璃清淨燈雲寶地妙色。以爲莊嚴。放於如來金色光明。念念常現一切上妙莊嚴之具。是爲六十九。如來左手復有大人相。名一切剎智慧燈音聲雲。以因陀羅網金剛華而爲莊嚴。放閻浮檀金清淨光明普照十方一切世界。是爲七十。如來左手復有大人相。名安住寶蓮華光明雲衆。

寶妙華以爲莊嚴。放大光明如須彌燈。普照十方一切世界。是爲七十一。如來左手復有大人相。名徧照法界雲。以妙寶鬘寶輪寶瓶。因陀羅網及衆妙相。以爲莊嚴。放大光明普照十方一切國土。於中示現一切法界。一切世界海。一切如來坐蓮華座。是爲七十二。

〔疏〕左中七十二云。因陀羅網爲嚴者。卽是網輓之相。相互涉入故。

如來右手指有大人相。名現諸劫刹海旋雲。水月燄藏摩尼王。一切寶華以爲莊嚴。放大光明充滿法界。

其中恒出微妙音聲滿十方刹。是爲七十二。如來左手指有大人相。名安住一切寶雲。以帝青金剛寶而爲莊嚴。放摩尼王衆寶光明。充滿法界。其中普現一切諸佛及諸菩薩。是爲七十四。

疏次一左右指二相

如來右手掌有大人相。名照耀雲。以摩尼王千輻寶輪而爲莊嚴。放寶光明。其光右旋。充滿法界。於中普現一切諸佛。一一佛身光燄熾然。說法度人。淨諸世界。是爲七十五。如來左手掌有大人相。名燄輪普增長。化現法界道場雲。以日光摩尼王千輻輪而爲莊

嚴放大光明。充滿一切諸世界海。於中示現一切菩薩。演說普賢所有行海。普入一切諸佛國土。各各開悟無量衆生。是爲七十六。

〔疏〕後二左右掌皆有千輪者。輪轂輻輳。二事具足。自然成就。不待人功。

○第十四陰藏一相

如來陰藏有大人相。名普流出佛音聲雲。一切妙寶。以爲莊嚴。放摩尼燈華。燄光明。其光熾盛。具衆寶色。普照一切虛空法界。其中普現一切諸佛。遊行往來。處處周徧。是爲七十七。

〔疏〕陰藏一相。猶如馬王。

○第十五坐處二相

如來右髻有大人相。名寶燈鬘。普照雲。諸摩尼寶。以爲莊嚴。放不思議寶焰。光明彌布十方。一切法界。與虛空法界同爲一相。而能出生一切諸相。一一相中。悉現諸佛自在神變。是爲七十八。如來左髻有大人相。名示現一切法界。海光明彌覆虛空雲。猶如蓮華。清淨妙寶。以爲嚴飾。放光明網。徧照十方。一切法界。於中普現種種相雲。是爲七十九。

○第十六勝有二相

如來右脞有大人相。名普現雲。以衆色摩尼而爲莊嚴。其脞與膺上下相稱。放摩尼燄妙法光明。於一念中能普示現一切寶王遊步相海。是爲八十。如來左脞有大人相。名現一切佛無量相海雲。一切寶海隨順安住。以爲莊嚴。廣大遊行。放淨光明普照衆生。悉使希求無上佛法。是爲八十一。

〔疏〕左云隨順安住者。脞多行動。故須多寶。隨順而嚴。

○第十七膺有三相

如來右邊伊尼延鹿王膺有大人相。名一切虛空法。

界雲光明妙寶以爲莊嚴其相圓直善能遊步放閻
浮金色清淨光明徧照一切諸佛世界發大音聲普
皆震動復現一切諸佛國土住於虛空寶燄莊嚴無
量菩薩從中化現是爲八十二如來左邊伊尼延鹿
王膺有大人相名莊嚴海雲色如真金能徧遊行一
切佛刹放一切寶清淨光明充滿法界施作佛事是
爲八十三如來寶膺上毛有大人相名普現法界影
像雲其毛右旋一一毛端放寶光明充滿十方一切
法界示現一切諸佛神力其諸毛孔悉放光明一切
佛刹於中顯現是爲八十四

疏第三膺毛。通於二膺。若準晉經。直云毛端。則通身一切毛也。義應如昔。則處成十九。

○第十八足有十三相

如來足下有大人相。名一切菩薩海安住雲。色如金剛。閻浮檀金。清淨蓮華。放寶光明。普照十方諸世界。海寶香燄雲。處處周徧。舉足將步。香氣周流。具衆寶色。充滿法界。是爲八十五。

疏通分爲七。初足下一相。畧無左右。而晉經足跌之後。別有足下千輻輪相。此必合有。故後品明足下輪相。名普照王。今經千輪之言。乃在指間。或以

常明易知。指間有異。故舉之耳。名安住者。以足下安平。一切著地。不容針故。

如來右足上有大人相。名普照。一切光明雲。一切衆寶。以爲莊嚴。放大光明。充滿法界。示現一切諸佛菩薩。是爲八十六。如來左足上有大人相。名普現。一切諸佛雲。寶藏摩尼。以爲莊嚴。放寶光明。於念念中。現一切佛神通變化及其法海。所坐道場。盡未來際劫。無有間斷。是爲八十七。

疏二足上。

如來右足指間有大人相。名光照。一切法界海雲。須

彌燈摩尼王千輻燄輪種種莊嚴放大光明充滿十方一切法界諸世界海中普現一切諸佛所有種種寶莊嚴相是爲八十八如來左足指間有大人相名現一切佛海雲摩尼寶華香燄燈鬘一切寶輪以爲莊嚴恒放寶海清淨光明充滿虛空普及十方一切世界於中示現一切諸佛及諸菩薩圓滿音聲出字等相利益無量一切衆生是爲八十九

〔疏〕三足指間。

如來右足跟有大人相名自在照耀雲帝青寶末以爲莊嚴常放如來妙寶光明其光妙好充滿法界皆

同一相無有差別。於中示現一切諸佛坐於道場演說妙法。是爲九十。如來左足跟有大人相。各示現妙音演說諸法海雲。以變化海摩尼寶香。燄海須彌華摩尼寶。及毗瑠璃而爲莊嚴。放大光明充滿法界。於中普現諸佛神力。是爲九十一。

疏四足跟。

如來右足趺有大人相。各示現一切莊嚴光明雲。衆寶所成極妙莊嚴。放閻浮檀金色清淨光明。普照十方一切法界。其光明相猶如大雲。普覆一切諸佛道場。是爲九十二。如來左足趺有大人相。各現衆色相。

雲。以一切月。燄藏毗盧遮那寶。因陀羅尼羅寶。而爲莊嚴。念念遊行諸法界海。放摩尼燈香。燄光明。其光徧滿一切法界。是爲九十三。

疏五足跋。

如來右足四周有大人相。名普藏雲。因陀羅尼羅金剛寶。以爲莊嚴。放寶光明。充滿虛空。於中示現一切諸佛。坐於道場。摩尼寶王師子之座。是爲九十四。如來左足四周有大人相。名光明徧照法界雲。摩尼寶華。以爲莊嚴。放大光明。充滿法界平等一相。於中示現一切諸佛及諸菩薩。自在神力。以大妙音演說法

界無盡法門。是爲九十五。

疏六足四周。因陀羅尼羅者。此云帝青。

如來右足指端有大人相。各示現莊嚴雲。甚可愛樂。閻浮檀清淨真金。以爲莊嚴。放大光明。充滿十方一切法界。於中示現一切諸佛及諸菩薩無盡法海種種功德神通變化。是爲九十六。如來左足指端有大人相。名現一切佛神變雲。不思議佛光明月燄。普香摩尼寶燄輪。以爲莊嚴。放衆寶色清淨光明。充滿一切諸世界海。於中示現一切諸佛及諸菩薩。演說一切諸佛法海。是爲九十七。

疏七足指端。上六各左右爲二。文顯可知。上來畧列九十七相。次第數名。譯者安置。旣不說盡。豈不盈百。足下闕一。脣齟不開。設合此二。六根皆辨。耳何獨殊。若加兩耳。及足下一。則圓百數。以顯無盡。豈不妙哉。况此中所列於三十二。尙有未盡。豈瞽賢力不及百耶。晉經有遺。但九十四。亦無次第之數。故知九十七數。不在生情。配屬諸法。

○第三結畧顯廣

佛子。毗盧遮那如來。有如是等十華藏世界海微塵數大人相。一一身分。衆寶妙相。以爲莊嚴。

〔疏〕別說難周。故須結畧。非畧能盡。故須顯廣。一華藏塵。相已無邊。况十華藏。則無盡無盡。非瞽眼者。安能覩歟。既三十二相。權實不同。互有互無。故不會釋。如來十身相海竟。

南平縣洋頭坊弟子程日起法名太會
刊刻
華嚴經如來十身相海品疏論纂要第
八十二卷伏願資大法之力崇人天之
福離諸魔障吉祥如意
康熙二十二年六月 日華藏室謹題

大方廣佛華嚴經疏論纂要卷第八十三